

>>Dengan penampilan sederhana dan tenang, Dr Mahathir amat disegani ramai dan dipandang tinggi



HARIAN METRO

Diiktiraf tokoh berpengaruh dunia

Dalam setahun kepemimpinannya sebagai perdana menteri ketujuh Malaysia, Tun Dr Mahathir Mohamad menerima pengiktirafan global apabila dinamakan sebagai tokoh berpengaruh dunia.

Pada awal Januari lalu, beliau diiktiraf sebagai Lelaki Muslim Paling Berpengaruh Dunia bagi 2019 oleh penerbitan The Muslim 500, sekali gus mengetui senarai 500 lelaki Islam paling berpengaruh di dunia.

Pada April pula, Dr Mahathir disenaraikan antara 100 individu paling berpengaruh di dunia pada 2019 oleh majalah berita antarabangsa, 'Time'.

Dan awal bulan ini, beliau dinamakan pula sebagai 50 Tokoh Dunia Paling Berpengaruh 2019 oleh portal antarabangsa, Fortune.com.

Ketiga-tiga penerbitan itu menggambarkan Dr Mahathir, 93, sebagai insan luar biasa kerana berjaya menerajui gabungan parti pembangkang, Pakatan Harapan, untuk memenangi pilihan raya umum ke-14 pada Mei tahun lalu, sekali gus dilantik semula sebagai Perdana Menteri Malaysia.

Selaku perdana menteri tertua di dunia, ramai mengenali Dr Mahathir sebagai pemimpin yang berani dan lantang bersuara, tegas dalam membuat keputusan, amanah dalam berkhidmat serta berdisiplin tinggi terutamanya dari segi ketepatan waktu.

Dengan penampilan sederhana dan tenang, Dr Mahathir amat disegani ramai dan dipandang tinggi sebagai pemimpin berwibawa yang mempunyai daya pemikiran tajam serta sentiasa melontarkan teguran bernas.

Antaranya semasa berucap pada Perhimpunan Agung Pertubuhan Bangsa-bangsa Bersatu (PBB) ke-73 di New York pada 29 Sept lepas di mana Dr Mahathir dengan lantang mengulangi desakan supaya pembaharuan dilaksanakan dalam badan dunia itu termasuk mencadangkan supaya kuasa veto dimiliki oleh sekurang-kurangnya dua negara kuasa besar dengan disokong oleh tiga anggota bukan tetap Majlis Keselamatan PBB.

Beliau turut menarik perhatian pelbagai organisasi dunia apabila berani menempelak kerajaan Myanmar berikutan pembunuhan beramai-ramai etnik Rohingya di Rakhine selain mencadangkan dunia supaya mengiktiraf Palestin dan pada masa sama menghentikan tindakan Israel daripada mencabuli undang-undang antarabangsa.

Pada Oktober lalu, Maharaja Akihito berkenan menyampaikan

darjah kebesaran 'The Grand Cordon of the Order of the Paulownia Flowers' kepada Dr Mahathir iaitu penganugerahan darjah kebesaran tertinggi Jepun berikutan sumbangan besar perdana menteri dalam memperkuatkan hubungan dua hala Malaysia dan Jepun.

Pensyarah Jabatan Komunikasi, Fakulti Bahasa Moden dan Komunikasi, Universiti Putra Malaysia (UPM) Dr Syed Agil Alsagoff berkata, Dr Mahathir diiktiraf sebagai pemimpin berwibawa berikutan idea dan pemikirannya mendapat pujian pemimpin dunia sejak sekian lama.

Dr Mahathir yang pernah menjadi pengurus Pertubuhan Kerjasama Islam (OIC) antaranya banyak mengaturkan strategi penyataan negara Arab daripada terus dibelenggu pengaruh Amerika Syarikat dan Israel.

Kelantangan beliau menentang pencerobohan Israel di bumi Palestin dan pencerobohan Amerika Syarikat di bumi Iraq pada waktu itu telah memberikan dorongan dan semangat kepada negara Arab

untuk menyokong kepemimpinan beliau dan mengiktirafnya sebagai pemimpin dunia yang disegani.

"Kejayaan Dr Mahathir merubah Malaysia dari sebuah negara dunia ketiga menjadi negara membangun menarik minat negara Asia Barat untuk mencontohi kepemimpinan politik beliau. Malah negara Asia

Timur juga menjadikan beliau sebagai insan contoh dalam memperkasa politik dan ekonomi negara tersebut," kata-nya.

Syed Agil berkata, Dr Mahathir juga dianggap negawaran

Islam yang berjaya merubah persepsi masyarakat terhadap kepemimpinan beliau dan Malaysia berikutan kelantangan Malaysia mengkritik dasar Myanmar terhadap pelarian Rohingya, pencerobohan Israel di Palestin serta krisis yang berlaku di Syria.

Dalam pada itu, Dr Mahathir dikenang dan diingati sebagai pemimpin Malaysia yang banyak menyalurkan bantuan kepada Bosnia dan Herzegovina ketika negara Balkan itu dilanda pepe-

rangan pada 1990-an selain terus memberi sumbangan dalam membangunkan semula negara tersebut.

Kejayaan beliau menyatukan negara membangun dan negara dunia ketiga menerusi majlis perundingan Dialog Antarabangsa Langkawi (LID) serta mencetus penyatuan kerjasama negara dunia ketiga dan negara Islam melalui OIC membuatkan beliau diangkat sebagai pemimpin dunia yang disegani dan cemerlang dalam arena politik antarabangsa.

Profesor Politik dan Perhubungan Antarabangsa, Sekolah Pengajian Antarabangsa Universiti Utara Malaysia (UUM) Prof Dr Azizuddin Mohd Sani berkata, Dr Mahathir adalah pemimpin yang konsisten dalam memperjuangkan isu dunia termasuk yang membabitkan penduduk Palestin, Rohingya dan negara membangun atau mundur yang lain.

Sebagai insan yang bencikan kekejaman, katanya Dr Mahathir pernah menubuhkan Tribunal Jenayah Perang Kuala Lumpur bagi 'membicarakan' pemimpin negara yang terlibat dengan jenayah perang di Iraq pada 2003 yang menyebabkan 1.4 juta orang

awam terkorban.

"Beliau juga amat anti dengan pembunuhan kaum. Sebab itulah apabila usahanya untuk mengiktiraf Statut Rom digagalkan, beliau bersa marah kepada pihak yang menjadi punca kepada kegagalan itu.

"Daripada kelantangannya ber-suara, kita boleh lihat bahawa Dr Mahathir mahu Malaysia terus menjadi Harimau Asia yang lantang menyuarakan isu global," katanya.

Pada masa sama, katanya pemimpin negara Asia Barat terus menyanjungi dan menghormati Dr Mahathir sehingga menganggap beliau sebagai 'suara' mereka dalam menentang penindasan Barat.

Dr Mahathir juga dikenali ramai sebagai perdana menteri yang berdedikasi, berprinsip teguh dan sentiasa melakukan reformasi dan transformasi dalam pentadbiran negara.

Syed Agil berkata, ia 'membuka mata' negara lain untuk menjadikan Malaysia sebagai contoh berikutan keupayaan melaksanakan transformasi politik di bawah kepemimpinan seorang bekas perdana menteri yang dilantik buat kali kedua menyandang jawatan tertinggi kerajaan itu. — BERNAMA

Dialog Kotaraya

Oleh Juragan

